

浙江通志卷二十三

官師志第五之三

梁

謝覽仕梁爲吳興太守時中書舍人王睦之家居烏程子弟專橫前守皆折節事之覽未到郡睦之弟迎覽覽逐去其舡杖吏爲通者自是睦之家杜門不出初郡境多劫盜爲東道患覽下車肅然初齊明帝及覽父淪徐孝嗣皆號吳興名守覽皆過之覽昔在新安頗聚斂至是遂稱廉潔時人方之王述

張稷字公喬吳縣人幼有孝性武帝時爲吳興太守

下車存問遺老引其子孫置之右職政稱寬恕子嵎亦吳興太守

張嵎字四山稷之子少敦孝行爲吳興太守侯景圍建業遣弟伊率郡兵赴援城陷御史中丞沈浚違難東歸嵎往見之謂曰賊臣憑陵正人臣効命之日今欲收集兵刃保據貴鄉雖復萬死誠亦無恨浚因勸嵎舉義兵時邵陵王綸東奔至錢唐聞之遣前舍人丘公板授嵎征東將軍嵎曰天子蒙塵今日何情復受榮號留板而已賊行臺劉神茂攻破義興遣使說嵎斬其使仍遣軍破神茂景復遣兵助神茂擊

嵎軍敗乃釋戎服坐于廳事賊臨以刃終不屈以送景景將舍之嵎曰速死爲幸乃殺之一門俱被害賊平元帝追贈侍中中衛將軍開府儀同三司謚忠貞

蔡搏字景節陳留考城人爲吳興太守在官惟飲郡

井齋前自種紫茄白菟以爲常餌詔褒其清加信武

將軍天監九年宣城郡吏吳伯承挾妖道聚衆攻宣

城殺太守轉寇吳興吏人並請遣之搏堅守不動命

衆出戰摧破伯承餘黨悉平累遷吏部尚書

殷不佞字季卿少立名節居父喪以至孝稱好讀書

尤長吏術梁承聖初爲武康令時兵荒饑餓百姓流  
移不佞循撫招集繼負至者以千數會魏克江陵而  
毋卒道路隔絕久不得奔赴四載之中晝夜號泣居  
處飲食常爲居喪之禮陳武帝受禪除婁令至是第  
四兄不齊始于江陵迎母喪柩歸葬不佞居處之節  
如始聞問若此者又三年身自負土手植松柏每歲  
時伏臘必三日不食文帝時兼尚書右丞遷東宮通  
事舍人及廢帝嗣立宣帝爲太傅錄尚書輔政甚爲  
朝望所歸不佞素以名節自立又受委東宮乃與僕  
射到仲舉中書舍人劉師知尚書左丞王暹等謀

詔出宣帝衆人猶豫未敢先發不佞乃馳詣相府面  
宣詔旨令相王還第及事發仲舉等皆伏誅宣帝雅  
重不佞特赦之免其官而已及卽位以爲軍師始興  
王諮議叅軍後兼尚書左丞加通直散騎常侍卒初  
不佞兄不疑不占不齊並早亡事第二寡嫂張氏甚  
謹所得祿俸不入私室長子梵童位尚書金部郎  
伏暉字互曜曼容子也幼傳父業能言玄理與樂安  
任昉彭城劉曼俱知名梁武帝踐祚兼五經博士與  
吏部尚書徐勉中書侍郎周捨總知五禮事出爲永  
陽內史在郡清潔政務安靜徙新安太守在郡清恪

人賦稅不登者輒以太守田米助之郡多麻苧家人  
乃至無以爲繩其厲志如此爲國子博士時始與內  
史何遠累著清績武帝擢爲黃門侍郎俄遷信武將  
軍監吳郡事暉自以名輩素在遠前爲吏俱稱廉白  
遠累見擢暉循階而已意望不滿多托疾居家尋留  
會稽築宅自表解職詔以爲豫章內史乃出拜書侍  
御史虞曠奏請以大不敬論有詔勿論子挺博學有  
才爲南臺侍書御史

任昉字彥升傳昌人也早稱神悟八歲能屬文齊永  
明初王儉領丹陽尹引爲主簿儉每見其文必三復

以爲當時無比後爲竟陵王記室參軍時瑯琊王融  
有才雋自謂高出倫類見昉之文恍然自失梁武帝  
克建業霸府初開以爲驃騎記室參軍專主文翰及  
武帝踐祚歷給事黃門侍郎吏部郎出爲義興太守  
時有產子不舉者嚴其制罪同殺人尋轉御史中丞  
秘書監自齊永元以來祕閣篇籍厖雜昉校讐定目  
出爲新都太守在郡不事邊幅每曳杖徒行有詞訟  
者就路聽決爲政清省吏民便之及卒于官遺言不  
以郡中一物還家武帝聞之悲不自勝謚曰敬子  
徐摛字士秀東海剡人幼好學及長徧覽經史屬文

好爲新變不拘舊體晉安王綱出戍石頭武帝謂周捨曰爲我求一人文學俱長兼有行者欲令與晉安游處捨曰臣外弟徐摛形質陋小若不勝衣而堪此選帝曰必有仲宣之才亦不驚貌乃以摛爲侍讀王入爲皇太子轉家令兼管記尋帶領直摛文體旣別春坊盡學之宮體之發自斯而起帝聞之怒召摛加誚責及見應對明敏辭義可觀乃意釋因問五經大義次問歷代史及百家雜記末論釋教摛商較從橫應答如響帝甚加歎異更被親狎寵遇日隆領軍朱異不悅謂所親曰徐叟出入兩宮漸來見逼我須早

爲之所遂承間白帝曰摛年老又愛泉石意在一旦自養帝謂摛欲之乃召摛曰新安大好山水任昉等並經爲之卿爲我臨此郡中大通三年遂出爲新安太守爲政清靜教人禮義勸課農桑朞月風俗更改秩滿爲中庶子除太子左衛率及侯景攻陷臺城時簡文居永福省賊衆奔入侍衛走散莫有存者摛獨侍立不動徐謂景曰侯公當以禮見何得如此凶威遂折侯景乃拜由是常憚摛簡文嗣位進授左衛將軍固辭不拜簡文被景幽閉摛憂憤因感氣疾而卒子陵最知名

王承字安期初爲祕書郎累遷中書黃門侍郎兼國子博士時膏腴貴遊咸以文學相尚罕以經術爲業唯承獨好儒業遷長兼侍中俄轉國子祭酒承祖儉父暕皆爲此職三世爲國師前代未之有父之出爲東陽太守政存寬惠吏人悅之卒謚曰章承弟幼亦爲東陽太守兄弟俱簡重時朱异當朝用事車馬填門有魏郡申英嘗指异門曰此中輻湊皆爲利往能不至者唯大小王東陽耳時有褚翔者亦不至异門世並稱之

何遠字義方東海人仕齊爲奉朝請梁武帝卽位遷

武昌太守性嚴被劾除名後爲武康令厲廉節除淫祀正身率職人甚稱之太守王彬巡屬縣諸縣皆盛供帳以待遠獨糗水而已彬去遠送至境進斗酒隻攜而別彬戲曰卿禮有過陸納將不爲古人所笑乎武帝聞其能擢爲宣城太守遷東陽太守遠處職疾強富如仇讐視貧細如子弟爲豪右所畏憚

江革字休映濟陽考城人也幼而聰敏早有才思六歲便解屬文與第四弟觀同生少孤貧傍無師友兄弟自相訓勗讀書精力不倦與觀俱詣太學補國子生舉高第齊中書郎王融吏部郎謝朓雅相欽重朓

嘗行還過候革時大寒雪見革弊絮單席而耽學不  
倦嗟嘆久之乃脫其所著襦并手割半氈與革充卧  
具而去建安王爲雍州刺史表求管記以革爲征北  
記室參軍兼中廬令與弟觀少長共居不忍離別苦  
求同行以觀爲征北行參軍兼記室時沈約任昉與  
革書云伏覩雍府妙選英才文房之職總卿昆季可  
謂馭二龍于長途騁騏驎于千里後爲鎮北豫章王  
長史廣陵太守時魏元法僧降附革被敕隨府王鎮  
彭城城旣失守革素不便馬汎舟而還途經下邳爲  
魏人所執魏徐州刺史安豐王延明聞革才名厚加

接待革稱脚疾不拜延明將害之見革辭色嚴正更  
加敬重時祖暉同被拘繫延明使暉作歌器漏刻銘  
革唾罵暉曰卿荷國厚恩已無報答乃爲虜立銘孤  
負朝廷延明聞之乃令革作文八寺碑并祭彭祖文  
革辭以囚執旣久無復心思延明將加箠扑革厲色  
曰江革年六十不能殺身報主今日得死爲幸誓不  
爲人執筆延明知不可屈乃止日給脫粟三升僅餘  
性命會魏帝請中山王元略反北乃放革及祖暉還  
朝上大宴舉酒勸革曰卿那不畏延明害對曰臣行  
年六十死不爲天豈畏延明帝曰今日始見蘇武之



節時武陵王紀在東州頗驕縱上以減盾性弱不能  
匡正召革慰遣乃除武陵王長史會稽郡丞行府州  
事革門生故吏家多在東聞革應至並賚待緣道迎  
候革曰我通不受餉不容獨當故人筐篚至鎮唯資  
公俸食不兼味郡境殷廣辭訟日數百革分判辯析  
曾無疑滯人安吏畏百城震恐瑯琊王審爲山陰令  
贓貨狼籍望風自解府王憚之每侍讌言論必以詩  
書王因此耽學好文典籤沈熾文以王所製詩呈武  
帝帝謂僕射徐勉曰革果稱職乃除都官尚書將還  
贈遺一無所受唯乘臺所給一舸舸艚偏欹不得安

請濟江徙重物以迄輕艚革既無物乃于西陵  
岸取石十餘片以實之其清貧如此

虞肩爲山陰令在任贓汙數百萬御史中丞陸杲奏  
劾收之肩賂中書舍人黃睦之囑杲冀少免杲不答  
武帝聞之以問杲杲答曰有之上曰識睦之否杲曰  
臣不識其人時睦之在御側帝指示曰此人是也杲  
謂睦之曰君誠小人何敢爲贓吏窩主乎睦之失色  
肩竟追贓坐法後肩私謂所親曰吾始以爲朝貴足  
恃乃今知不足恃徒使名與利兩失之也

劉潛爲赤城郡守時憲令踈濶百姓多不遵業潛撫

綏有術俗爲之變

王份字季文仕宋爲如安內史袁粲以蕭道成篡弒同沈攸之討道成爲道成所殺親故無敢視者份獨往致慟由是顯名累遷大司農道成卽位是爲齊武帝王奐以誣搆殺人被誅其子蕭奔魏份自拘請罪武帝宥之蕭屢引魏人至邊份嘗因侍坐武帝謂曰比有北信否份改容對曰蕭旣近忘墳墓寧遠憶有臣帝亦以此亮焉後爲祕書監仕梁爲散騎常侍領步兵校尉武帝嘗於宴席問群臣曰朕爲有爲無份曰陛下應萬物爲有體至理爲無帝稱善後累遷尚

書

歷侍中特進左光祿大夫監丹陽

范晉安太守在郡清約資公祿而已視事四年徵爲尚書左丞

何敬容廬江人普通四年以吏部尚書出爲招遠將軍吳興太守勤恤民隱辨訟如神視事四年治爲天下第一大通二年召爲中書令

柳暉字文暢河東解人天監中爲吳興太守政尚清靜吏民安之嘗感疾乞休父老詣闕留者數千人張彪不知何許人自云家本襄陽少亡命在若耶山爲盜頗有部曲王僧辯遇之甚厚引爲爪牙貞陽侯

踐位爲吳郡太守東揚州刺史剡令王懷之不從彪  
自征之留長史謝岐居守會僧辯見害彪不自展拔  
時陳禧已據震澤將及會稽彪乃遣沈泰吳寶真還  
州助岐保城彪後至泰等反與岐迎陳禧入城彪因  
其未定踰城而入陳禧遂走出彪復城守沈泰說陳  
禧曰彪部曲家口並在香巖寺可往收取遂往盡獲  
之彪將申進密與泰相知因入叛彪彪復敗走不敢  
還城據城之西山樓子及暗得與弟崑崙妻楊氏去  
猶左右數人追隨彪疑之皆發遣唯常所養一犬名  
黃蒼在彪前後未曾捨離乃還入若耶山中沈泰說

陳禧遣章昭達領千兵重購之并圖其妻彪眠去覺  
黃蒼驚吠劫來便啣一人中喉旣死彪拔刀逐之映  
火識之曰何忍舉惡卿湏我者仲子取頭誓不生見  
陳禧劫遂殺彪并弟致二首於昭達黃蒼號叫彪屍  
側宛轉血中若有哀狀彪始起于若耶與于若耶終  
于若耶

孫廉字思約東莞人天監初沈約范雲當朝用事廉  
傾意奉之及中書舍人黃睦之等亦尤所結附凡貴  
要每食廉必日進滋味皆手自煎調不辭勤劇遂得  
爲列卿歷官吳興太守雖其人品卑下而處官平直

亦以善政稱

杜龕杜陵人岑之子也少驍勇善用兵與諸父歸元帝帝以爲鄖州刺史封中盧縣侯與王僧辯討平河東又隨僧辯至巴陵聞侯景陷郢州乃與僧辯等守巴陵景至圍之數旬不克而遁衆軍至姑熟景將侯子鑒逆戰龕與陳霸先王琳等擊之大敗子鑒遂至石頭景親會戰龕與衆軍大破之論功爲最授東揚州刺史又與王僧辯降陸納平武陵王及魏平江陵後齊納真陽侯明以紹梁嗣以龕爲震州刺史吳興太守遷南豫州刺史封溧陽縣侯又加散騎常侍鎮

大將軍龕僧辯婚也始爲吳興太守以郡人陳霸先本非素貴而宗族豪橫遂以法繩之無所縱捨霸先嚙之切齒及僧辯敗龕乃據吳興以拒之屢敗陳蒨軍龕好飲酒終日恒醉勇而無畧部將杜泰私通于蒨說龕降其妻王氏曰霸先讎隙如此何可求和因出私財募兵復大敗蒨軍後杜泰降龕尚醉不覺蒨遣人負出項王寺前殺之王氏因截髮出家杜氏一門覆矣

劉杳爲餘姚令在縣清潔湘東王繹發檄褒美之大通元年爲步兵校尉兼東宮通事舍人昭明太子諱

曰酒非卿所好而爲酒府之職政爲卿不愧古人耳  
太子有瓠食器因以賜焉曰卿有古人之風故遺卿  
古人之器俄有敕代裴子野知著作郎事昭明太子  
薨新宮建舊人例無停者敕特留杏焉僕射何敬容  
奏轉杏王府諮議武帝曰劉杏湏先經中書仍除中  
書侍郎尋爲平西湘東諮議參軍兼舍人著作如故  
遷尚書左丞卒杏清儉無所嗜好自居母憂便長斷  
居羶持齋蔬食臨終遺命歛以法服載以露車還葬  
墓隨得一地容棺而已不得設靈筵及祭醊其子  
之撰要雅五卷楚辭草木疏一卷高士傳

京官新舊記三十卷古今四部書目五卷文集十五  
卷並行于世

席闡文安定臨涇人幼孤貧涉獵書史任南齊爲雍  
州刺史梁武帝時除都官尚書出爲東陽太守在郡  
有能名冬至悉放獄囚依期而至改封湘西侯卒謚  
曰威

留異東陽長山人梁太清間侯景逼臺城異募士隨  
太守沈巡入援城陷異還鄉里景平後王僧辯以異  
爲東陽太守及陳蒨襲會稽異饋蒨糧食陳霸先篡  
梁卽帝位論異有應接功以豐安公主妻其子貞臣

徵異爲南徐州刺史異遷延不就乃復以異爲縉州  
刺史領東陽太守異屢遣其長史王漸入朝漸每言  
朝廷虛弱異信之雖外示臣節恒懷兩端潛與王琳  
通結琳敗上遣沈恪代異異出軍以拒恪恪與戰而  
敗退還錢唐異復上表遜謝時衆軍方事湘郢乃降  
詔慰諭且羈縻之異知終將討已乃以兵戍下淮及  
建德以備江路于是詔命徐州刺史侯安都討之時  
閩州刺史陳寶應異之婿也陰與異合周迪亦以論  
功不平亦與異結異謂臺軍必由錢唐而上旣而安  
都步由諸暨出永康異大驚奔桃枝嶺又奔晉安依

陳寶應安都繫其妻及餘子取收鎧仗而還旣而周  
迪爲安成王頊所敗衆潰亦奔晉安依陳寶應寶應  
以兵資迪異又遣子忠臣隨之安都恃功驕橫舍人  
蔡景歷上其謀反賜死於是遣護軍章昭達將兵討  
周迪昭達追擒之并擒留異及其族黨送建康斬之  
異子貞臣以尚主得免寶應賓客皆死

江子一字元亮濟陽人晉散騎常侍統之七世孫也  
少慷慨有大志家貧以孝聞仕梁起家爲王國侍郎  
奉朝請上書言事爲當軸所排乃拜表求入北爲刺  
客武帝異之又啓求觀書秘閣武帝許之有敕直華

林省其姑夫朱异權要當朝休暇之日賓客輻奏异  
 不為物議所歸欲引子一為助子一未嘗造門其高  
 黎如此弟子四歷尚書金部郎大同初遷右丞兄弟  
 性並剛烈子四自右丞上封極言得失武帝甚善之  
 詔曰屋漏在上知之在下其令尚書詳擇施於時政  
 侯景攻陷歷陽自橫江將渡子一帥舟師千餘人於  
 下流欲邀之其副 沈生走子一乃退還南洲收餘  
 衆步遊建業見於 帝怒具以事對且曰臣以  
 身許 國當效死 日之事何所 以惜不死關  
 關子一及子一

四子五並力戰直前子一子四死子五傷脰還至壘  
 一慟而絕詔贈子一給事黃門侍郎子四中書侍郎  
 子五散騎侍郎侯景平元帝又追贈子一侍中謚義  
 子子四黃門侍郎謚毅子子五中書侍郎謚烈子  
 沈瑀字伯瑜吳興人為建德令教人一丁種十五株  
 桑四株柿及梨栗頃之成林改為餘姚令大姓千餘  
 家請謁如市前後令長莫可誰何自瑀至以法繩之  
 權右屏跡

庾華字休野新野人仕南齊為驍騎將軍功曹史有  
 口辯後為荊州別駕清身率下妻子不免飢寒明帝

手勅褒美累遷會稽郡丞清節愈厲時承凋弊之後  
所在穀貴民多流散董撫循甚有治理梁高祖大監  
元年卒柩不能歸高祖聞之賜絹百疋米五十斛  
陳霸先字興國小字法生吳興長城下若里人也其  
本甚微梁天監二年癸未歲生少儻有大志不事  
生產及長好讀書明緯候孤虛遁甲之術初爲里  
司後至建業爲油庫吏蕭映爲吳興太守霸先勤于  
其事爲映所賞及映爲廣州霸先爲中直兵參軍隨  
之鎮時李賁連結數州遠近同時反臺遣高州刺史  
孫罔新州刺史盧子雄將兵擊賁罔等不時進皆于

廣州伏誅子雄弟子畧與罔子姪共舉兵進寇廣州  
州人震恐霸先率精兵救之賊衆大潰其年冬蕭映  
卒明年霸先送喪還至大庾嶺會有詔以霸先爲交  
州司馬所向摧陷遂斬賁傳首建業是歲太清元年  
也二年冬侯景寇逼梁武霸先將赴援大寶元年正  
月霸先發始興次大庾嶺進頓南康湘東王繹承制  
授霸先交州刺史尋改封長城縣侯都督會稽東陽  
新安臨海永嘉五郡諸軍事領會稽太守與王僧辯  
督衆軍討侯景誅之傳首江陵湘東王繹卽位是爲  
元帝甫三年魏伐梁入江陵執繹殺之繹子方智立



于潯陽是爲敬帝王僧辯奉貞陽侯蕭淵明歸建康立之改元天成降方智爲太子明年霸先殺王僧辯廢淵明仍立方智又明年霸先自爲長城公尋篡位國號陳都建康改元永定廢其主方智爲江陰王明年夏四月弒之

陳蒨字子華霸先之從子也少沉敏有識量留意經史霸先愛之梁大寶二年霸先以平侯景功進位司空蒨爲吳興太守蒨起布衣知百姓疾苦務從儉約及霸先踐祚爲陳武帝立蒨父爲始興昭烈王蒨爲臨川王武帝崩徵蒨卽位爲陳文帝

陳昌字敬業霸先第六子也梁太清末霸先南征李賁命昌與其母隨沈恪還吳興及霸先東討侯景昌與陳蒨並爲景囚景平霸先爲司空拜昌爲長城國世子吳興太守時年十六昌雅性聰辯明習政事霸先遣陳郡謝哲濟陽蔡景歷輔昌臨郡又遣吳郡杜之偉授昌以經昌讀書一覽便誦明于義理剖析如流尋與陳頊俱往荊州魏克荊州又與頊俱遷長安霸先卽位後以昌爲湘州牧封衡陽郡王

王淮之字元魯晉尚書僕射彬玄孫也會祖彪之位尚書令祖臨之父納之並御史中丞彪之博文多識

練悉朝儀自是家世相傳並詣江左舊事緘之青箱  
世謂之王氏青箱學准之兼明禮傳贍于文辭桓玄  
篡位以爲尚書祠部郎宋武帝起兵爲太尉主簿出  
爲山陰令有能名預討盧循功封都亭侯宋臺建除  
御史中丞爲百僚所憚

于寶字令升汝南新蔡人徙居鹽官博覽書記著晉  
紀三十卷直而能婉作搜神記三十卷劉惔曰卿可  
謂鬼之董狐也初仕晉爲始安太守平杜弢有功賜  
爵關內侯至梁時領國史補山陰令

傅昭字茂遠靈州人晉司隸校尉咸七世孫也袁

見而奇之顛嘗來昭所昭讀書自若神色不改觀其  
曰此兒神情不凡必成佳器太原王延秀薦昭于丹  
陽尹袁粲深見禮辟爲郡主簿使諸子從昭受學尋  
爲總明學士梁武帝素重昭梁臺建以爲給事黃門  
侍郎領著作兼御史中丞歷位左戶尚書安成內史  
郡自宋來兵亂相接府舍稱凶每昏旦間人鬼相觸  
在任者鮮以吉終及昭至有人夜見甲兵出曰傅公  
善人不可侵犯乃騰虛而去有頃風雨總至飄郡廳  
事入墜中自是郡遂無患咸以昭真正所致郡溪無  
魚或有暑月薦昭魚者昭旣不納又不欲拒遂委于

門側又嘗爲臨海太守郡有蜜巖前後守皆自封固  
專其利昭戒勿封昭所蒞官常以清靜爲政不尚嚴  
肅居朝廷無所請謁不畜私門生不交私利終日端  
居以書記爲樂雖老不衰博極古今尤善人物魏晉  
以來官宦簿伐姻通內外舉而論之無所遺失世稱  
爲學府

丘遲字希範吳興人靈鞠之子也八歲善屬文及長  
爲中書辭采麗逸時鍾嶸評其詩曰范雲婉轉清便  
如流風回雪丘遲點綴映媚似落花依草遲後出守  
永嘉不稱職爲有司所劾

沈浚字叔源博學有才幹仕梁歷山陰吳建康三縣  
並有能名累遷御史中丞

裴子野字幾原少好學善屬文天監中爲諸暨令不  
行鞭罰民有爭者示之以理百姓稱悅合境無訟初  
子野會祖松之在宋元嘉中修何承天宋史未成而  
卒子野更撰宋畧二十卷其叙事評論多善武帝以  
爲著作郎修國史子野久在禁省默靜自守及歸茅  
屋數間妻子恒苦飢寒人以師道推之

庾沙彌穎川鄢陵人也父珮玉早沒沙彌事嫡母劉  
氏盡孝劉亡水漿不入口累日初進大麥薄飲十旬

方爲薄粥終喪不食鹽酢冬日不衣絮纊夏日不解  
衰經晝夜號慟隣人不忍聞其所卧席淚沾爲爛宗  
人都官尚書詠表言其狀因應純孝之舉補歛令復  
丁所生憂喪還濟浙江遇風幾沒沙彌抱柩號哭俄  
而風靜人咸以爲孝感起爲長城令卒于官邑人哀  
之

周文育義興人本姓項少孤貧周蒼奇之養爲己子  
教之書計文育曰誰能學此取富貴但有大槩耳遂  
教之騎射文育大悅仕梁以戰功進爵壽昌縣公

蕭映字文明年十二爲國子生天監十七年詔諸生

口策宗室可否帝知映聰解特令問策又口對並是  
奇謂祭酒袁昂曰吾家千里駒也封新喻縣侯後居  
大妃憂泣血三年服闋爲吳興太守郡累不稔大通  
三年野穀生武康凡二十二處自此豐穰映製嘉穀  
頌以聞下詔稱羨歷給事黃門侍郎衛尉卿廣州刺  
史卒謚曰寬侯

蕭琛蘭陵人遷吳興太守郡有項羽廟土民名爲憤  
王甚有靈驗卽郡廳事爲神座公私請禱前後二千  
石皆於廳拜祀而避居他室琛徙神還廟處之不疑  
蕭眎素性靜退少嗜慾好學能清言榮利不關于中

喜怒不形于色天然簡素累遷中書侍郎在位少時  
求爲諸暨縣令到縣十餘日挂衣冠于縣門而去  
蕭洽字宏稱幼敏悟年七歲覽楚辭輒成誦及長博  
學善屬文仕梁爲南徐州從事徐州近畿重鎮前後  
官于此者皆致巨富洽清約居身饋遺一無所受妻  
子不免饑寒遷臨海太守爲政和平不尚威猛民俗  
便之拜司徒左長史敕撰當塗堰碑辭甚贍麗有文  
集二十卷行于世

曾悉達岐陽郿人幼以孝聞侯景之亂與弟廣達聚  
衆保新蔡梁元帝授江州刺史後改吳州刺史

陳侯

陳

吳明徹字通炤秦郡人初陳武帝鎮京口深相結納  
及帝踐祚授明徹安南將軍討王琳軍敗還都文帝  
卽位爲吳興太守帝謂曰吳興帝鄉故以相授宣帝  
太建五年朝議北征詔加明徹侍中都督征討諸軍  
事將兵十餘萬至秦郡秦郡降帝以秦郡明徹故郡  
詔具太牢令拜祠上冢文武羽儀甚盛鄉里榮之明  
徹尋攻周師爲周所破窮蹙被執周封爲懷德郡公  
位大將軍以憂薨疾卒于長安

毛喜字伯武滎陽武人宣帝時爲吏部尚書兼侍中後主惡其直至德元年出爲永嘉太守不受俸秩政尚清靜吏民安之會豐州刺史章大寶反郡與豐接而素無備乃修城隍具器械閱士卒又分兵援建安事平授南安內史永嘉民建祠以祀之

謝謖梁東陽太守秩滿去官郡民送錢一萬止留一百民強納之答曰數多劉寵更以爲愧至陳時復爲東陽內史風俗頽敗甘事二姓則習以爲常恬不知愧也

褚玠字溫理九歲而孤早有令譽先達多以才器許之及長博學能屬文訓義典實不尚淫靡陳天嘉中爲通直散騎常侍聘齊還遷中書侍郎太建中山陰縣多豪猾前後令皆以贓污免宣帝謂中書舍人蔡景歷曰稽陰大邑久無良宰卿文士之內試思其人景歷進玠帝曰甚善卿言與朕意同乃除山陰令縣人張次的王休達等與諸猾吏賄賂通姦全丁大戶類多隱沒玠鑠次的等具狀啓臺宣帝手敕慰勞并遣使助玠搜括所出軍人八百餘戶時舍人曹義達爲宣帝所寵縣人陳信家富諂事義達信父顯文恃勢橫暴玠乃執顯文鞭之一百於是吏人股慄信後

因義達諧玠竟坐免官去官之日貧不能行因留縣境種蔬自給或謂玠非百里才玠曰吾委輸課最不後列城除殘去暴姦吏局躋若謂其不能自潤脂膏則如來命以爲不達從政吾未服也時人以爲信然皇太子知玠無還裝手書賜粟米二百斛於是還都後累遷御史中丞

徐陵字孝穆梁新安太守中庶子擒之子也梁晉安王爲太子時陵爲東宮學士及陳篡梁陵爲剡令後至尚書左僕射陵器局深遠性又清簡無所營樹僅與親族共之自陳創業文檄軍書及受禪詔策誓

所製爲一代文人其於後進接引無倦文宣之時國家有大製作必命陵草之每一文出好事者必傳寫或誦比達周齊家有其本後逢喪亂多所散失存者三十卷

徐份陵之子少有父風九歲爲夢賦陵見之謂所親曰吾幼屬文亦不加此爲海鹽令有政績入爲太子洗馬性孝弟陵嘗疾篤份燒香泣涕跪誦孝經日夜不息如是者三日陵疾豁然而愈親戚皆謂份孝感所致

陳仲舉字德言彭城人以著作郎太子舍人王府主

簿爲長興令政號廉平文帝未顯時嘗詣仲舉宅時屬風雨仲舉在齋中聞城外有簫鼓之音俄而帝至又嘗飲酒宿仲舉帳中忽神光直上五彩照耀由是深嘉附託後文帝登極授以尚書右僕射丹陽尹陳伯禮文帝第十子太建初爲吳興太守在郡恣行不義爲有司所劾置不問十一年召還當時諸國之速亡固多不道以諸王臨民亦其大端也

任忠字奉誠小名蠻奴汝陰人也爲陳領軍將軍初陳主以蕭巖蕭瓛梁之宗室擁衆來奔心忌之故遠散其衆以巖爲東揚州刺史瓛爲吳州刺史使忠出

守吳興郡以襟帶二州後命還都及隋兵濟江忠入見後主言敗狀後主與之金兩滕使募人出戰忠乃迎隋將韓擒虎及其兵衆自石子岡直入朱雀門陳人欲戰忠揮之曰老夫尚降諸軍何爲衆皆散走於是陳主出後堂景陽殿自投于井諸軍以繩引之而上隋獲後主以歸旣而隋文帝謂群臣曰平陳之初我悔不殺任蠻奴受人榮祿兼當重寶不能橫尸徇國乃云無所用力與弘演然肝何其遠也

隋

李德林字公輔博陵人也幼聰敏年十五誦五經及



古今文集日數千言該博墳典陰陽緯候無不通涉  
仕北齊爲中書侍郎與頰之推共撰脩文殿御覽及  
北齊亡周主邕以德林爲內史上士自是詔誥格式  
及用山東人物並以委之周主從容謂群臣曰我常  
日聞李德林名復見其爲齊朝作詔書移檄正謂是  
天上人豈言今日得其驅使周主殂子贇卽位自稱  
天元皇帝傳位于子闡天元卒楊堅自爲大丞相總  
朝政謂德林曰今欲與公共事必不得辭德林曰願  
以死奉公堅大喜私問德林曰欲何以見處德林曰  
宜作大丞相假黃鉞都督中外諸軍事不爾無以處

要 堅卽依此行之及堅篡位稱帝國號隋改元曰  
皇 貞德林功授柱國封郡公賞物三千段已宣  
高頰曰今歸功于德林諸將必當憤惋乃止但賜德  
林莊店使自擇之德林請衛國縣市店許之及隋主  
幸晉陽店人訴稱強奪民田自是惡之於是德林父  
終于校書乃妄稱爲太尉咨議以取贈官上愈厭之  
謂當以一州相遣因出爲湖州刺史德林拜謝曰臣  
不敢復望內史今請但預散叅上不許榮貴之願不  
遂尋怏怏卒不知其少所誦讀者果何爲哉  
沈法興武康人隋大業末爲吳興太守東陽賊樓世

幹畧其郡煬帝詔法興與元祐討之是時宇文化及弒煬帝于江都法興乘其變起兵據江表十餘郡稱帝于毘陵國號梁建元延康尋爲李子通所滅

賀若弼字輔伯河南洛陽人也少有大志文帝受禪拜吳州總管委以平陳事弼忻然以爲已任督厲將士殊死戰大敗之平陳後乃撰七策若弼自謂功名出朝臣之右每以宰相自許旣而楊素爲僕射弼仍爲將軍甚不平怨望形于言色上下弼獄謂之曰我以高穎楊素爲宰相汝每昌言曰此二人唯堪啗飯耳是何意也旣而上位日數日惜其功復其爵位然

亦不復任使但每燕賜遇之甚厚他日太子問于若弼曰楊素韓擒虎史萬歲皆稱良將其優劣何如弼曰楊素猛將非謀將韓擒虎鬪將非領將史萬歲騎將非大將太子曰然則大將誰也弼曰唯殿下所擇弼意蓋自許也

慕容三藏燕人也父紹宗齊尚書左僕射東南道大行臺三藏幼聰敏多武畧頗有父風仕齊釋褐太尉府參軍事尋遷備身都督轉右衛將軍周師入鄴時齊後主失守東遁委三藏等留守鄴宮齊之主公以下皆降三藏猶率麾下抗拒周師及齊平武帝引見

恩禮甚厚詔曰三藏父子誠節著聞宜加榮秩授開  
府儀同大將軍開皇元年授吳州刺史百姓愛悅  
楊素字處道自幼善屬文周主嘗謂之曰勉之勿憂  
不富貴素曰但恐富貴來逼臣臣無心圖富貴也隋  
平陳之後越州高智慧温州沈孝徹杭州楊寶英皆  
舉兵反自稱大都督攻陷州縣詔素爲行軍總管討  
平之論功加上柱國文帝時晉王楊廣結獨孤后素  
譖廢太子楊勇爲庶人立廣爲太子文帝疾廣逼烝  
宮侍帝覺怒仍召前太子勇素又矯詔召廣俄而帝  
崩廣立命素營洛陽宮室旣而其子玄感起兵圍洛  
陽尋敗素讒佞以圖富貴而天道昭明富貴不逼而  
禍害來逼矣

官師志第五之四

唐

龐玉京兆涇陽人仕隋為監門直閣唐秦王東狗洛  
玉率萬騎降高祖以隋舊臣禮之從秦王征伐擒薛  
仁果平隴西尋為越州總管威望甚著盜不敢入境  
武德二年巴山獠叛除王為梁州都督悉討平之召  
為監門大將軍卒贈工部尚書幽州都督

李大亮京兆涇陽人有文武才畧高祖入關大亮自  
歸授土門令方歲飢境多盜賊大亮招撫流離勸墾

田業間出擊盜所至輒平帝聞之悅擢金州總管府  
司馬尋授會稽刺史貞觀初徙交州尋都督涼州太  
宗賜荀悅漢紀曰悅議論深博極爲政之體公宜繹  
味之

汪華績溪人少以勇俠聞隋末兵亂以土豪應郡募  
保據郡境併有宣杭睦婺饒五州建號吳王至武德  
開籍土地兵民納款高祖授以總管歙宣杭睦饒婺  
六州軍事歙州刺史封越國公卒所在民祀之

方亮雉山人初汪華據歙稱王睦州已爲歙有及武  
德四年杜伏威命王雄誕平歙而復睦州用亮爲東

史武德五年八月使亮持節領廬申二州諸軍事賜  
詔曰本司刺史方亮往因喪亂保據邑土識達事幾  
早歸朝化勲庸克著誠效遠彰念此勤勞嘉嘆何極  
今四方平泰九有廓清宣慰部人脩營產業秋漸冷  
卿比平安好在否觀此詔知亮當唐初嘗不因朝命  
爲刺史其後納土歸化免其鄉里屠戮之苦誠節彰  
著是可嘉也唐史逸之

張懷約建昌人初仕隋官至學士後歸唐以爲温州  
司馬懷約幼有令名鄉人宗其德行尤博學強記文  
詞典麗講三禮三傳出諸儒之右性尚簡雅後隱于

當陽山莫知所終

張後胤字嗣宗蘇州崑山人童冠以學行名唐高祖鎮太原引爲客以經授秦王及太宗卽位遷燕王府司馬出爲睦州刺史乞骸骨帝顧其強力問欲何官因陳謝不敢帝曰朕從卿授經卿從朕求官何所疑後胤頓首願得國子祭酒授之

薛萬徹燉煌人太宗朝名將自右衛大將軍轉杭州刺史遷代州都督高宗永徽二年授寧州刺史入朝與房遺愛昵甚遺愛曰若國有變當與公共輔荆三讓下獄誅

王君照貞觀十年爲鄞縣令脩建小江湖溉田八百頃民資其利

李道古嗣曹成王皐之子自司門員外郎刺利隨唐睦四州入爲少宗正兼御史中丞以節督黔中代柳公綽觀察岳鄂道古自永徽至元和刺史除拜歷年最久乃因貪暴著聞恐獲罪薦方士柳泌媚上自全卒以貽君上之害云

崔義玄博平東武城人貞觀初歷左司郎中兼韓王府長史以介直稱永徽中爲婺州刺史時睦寇圍婺義玄統衆破賊降者萬餘拜御史大夫終蒲州刺史

詳見經武志

來濟揚州人護兒子也志篤爲文章善議論曉暢時務擢進士正觀中太子承乾敗太宗問侍臣何以處之濟曰陛下上不失爲慈父太子得盡天年則善帝納之永徽二年帝將以武氏爲后濟諫曰王者立后以承宗廟母天下宜擇禮義名家幽閑令淑者副四海之望稱神祇之意故文王與妣關雎之化蒙被百姓其福如此成帝縱欲以婢爲后皇統中微其禍如彼惟陛下詳察武后已立不自安出濟爲台州刺史濟父護兒本驍將而濟以學術稱知政事時虞世南

子烈無才術歷將作少匠許敬宗曰護兒兒作相世南男作匠文武豈有種耶

駱賓王義烏人七歲能賦詩初爲趙王府屬嘗使自言所能賓王不答歷武功主簿武后時數上疏言事除臨海丞鞅鞅不得志棄官去徐敬業討亂署賓王爲府屬爲敬業傳檄天下斥武后罪后讀但嘻笑至一抔之土未乾六尺之孤安在矍然曰誰爲之或以賓王對后曰宰相安得失此人敬業敗賓王亡命不知所之當是之時狄仁傑委曲以圖大功徐敬業慷慨以申大義而賓王則佐佑敬業者也或者乃謂敬

業及賓王被誅謬矣

杜暹濮州濮陽人擢明經第補婺州參軍秩滿歸吏以紙萬番贖之公爲受百番衆嘆曰與劉寵受一大錢何異哉人號百紙參軍官至禮部尚書封魏縣侯卒贈尚書右丞相謚貞孝

宋璟字廣平邢州南和人耿介有大節初居小官以所作梅花賦投蘇味道蘇稱之自是知名皮日休曰璟貞姿勁質剛態毅狀有鐵石心腸不解吐軟媚語歷杭州刺史政事清毅吏下無敢犯者開元初爲御史大夫坐監朝堂款人輕又出爲益州刺史後拜尚

書右丞爲唐名相詳見唐書璟本傳中

李本名務光滏陽人少以孝友著擢明經第

大官員外郎爲吏詳敏有治譽以採訪使行山南時

戶口逋蕩細弱下戶爲豪力所兼傑爲設科條區處

檢防亡匿復業者十七八神龍中爲河東巡察黜陟

使課最諸道先天中改河南尹傑旣精聽斷雖行坐

食飲省治不少廢繇是府無掩事人吏愛之時有婦

告其子不孝者傑物色非是謂婦曰子法當死無悔

乎答曰子無狀寧其悔乃命市棺還斂之使人迹婦

出與一道士語頃持棺至傑令捕道士內于棺河汴



之交舊有梁公埭廢不治南方漕弗通傑調汴鄭丁男作之不費而事集入代宋璟爲御史大夫尚衣奉御長孫昕素惡傑遇于道內恃玄宗姪婿與所親楊仙正共毆辱之傑訴曰敗髮膚痛在身辱衣冠耻在國帝怒詔杖殺昕等謝百官降書慰傑以護作喬陵封武威縣子初傑引侍御史王旭爲護陵判官旭貪贓傑將繩之未及發反爲所搆出爲衢州刺史遷揚州大都督府長史復爲御史劾免開元六年卒帝之特贈戶部尚書

馮昭泰以景龍元年自邢州刺史徙睦州性鷙刻人其強嘗誣繫桐廬令李師旦二百餘家爲妖毒詔御史覆驗皆稱病不肯往左臺御史李尚隱良方蒙枉不爲申明可乎因請行果推雪其冤昭泰服罪

姚崇字元之陝州硤石人武后時自夏官郎拜侍郎進平章事睿宗時進中書令玄宗在東宮太平公主干政宋王成器等分典閑廐禁兵崇與宋璟建請主就東都出諸王爲刺史以一人心主怒太子懼上疏以崇等甚間王室貶申州刺史移徐潞二州遷越州爲治簡肅所至人德其惠政先天二年徙同州刺史

玄宗講武新豐密召崇崇至帝方獵渭濱問崇曰公知獵乎對曰少所習也臣年二十以呼鷹逐獸爲樂張景藏謂臣當位王佐無自棄故折節讀書遂待罪宰相然少爲獵師老而猶能帝悅與俱馳逐緩急如指帝歡甚因上十事要說遂爲開元賢相詳具唐書崇本傳中

岑仁敬開元十三年以大理少卿爲杭州刺史時上自選諸司長官有聲者十一人爲刺史命宰相諸王及諸司長官臺郎餞于洛濱供張甚盛賜以御膳太常具樂內坊歌妓上自書十韻詩命高力士賜之仁敬其一也

劉幽求冀州人聖曆中舉制科中第授朝邑尉桓彥範等誅張易之昌宗而不殺武三思幽求謂彥範曰公等無葬地矣不早計後且噬臍不從既五王皆爲三思搆死臨淄王入誅韋庶人預叅大策睿宗立遷侍中璽詔曰頃王室不造中宗厭代戚孽專亂將隕社稷朕與王公皆幾爲難幽求處危思奮翊贊聖儲協和義士震殄元惡國家之復存繫幽求是賴厥庸茂焉朕用嘉之雖胙以土宇而賦入未廣宜加賜賞封二百戶子子孫孫傳國無絕先天元年爲尚書右

僕射同中書三品幽求自謂有勞于國意望未滿而  
崔湜附太平公主有逆計幽求與張暉定計使暉說  
元宗曰湜等皆太平公主黨與日夜陰計若不早圖  
且產大害太上不得高枕矣臣請除之帝許之未發  
也而暉漏言帝懼乃流幽求于封州明年太平公主  
誅詔復舊官姚崇素忌之奏幽求鬱快散職有怨言  
詔有司鞫治盧懷慎等奏言幽求輕肆不恭失大臣  
體貶睦州刺史遷杭州卒于道六年詔與蘇環配享  
睿宗廟庭

劉長卿字文房河間人開元二十一年進士至德中

爲監察御史以檢校祠部員外郎爲轉運使判官知  
淮西鄂岳轉運留後鄂岳觀察使吳仲儒誣奏貶潘  
州南巴尉會有爲辨之者除睦州司馬終隨州刺史  
卒有集十卷傳于世

房瑄字次律河南人少好學風度沉整隱陸渾山不  
諧人事開元初爲睦州司戶復爲建德令又遷慈谿  
令尚德化興常利流民懷歸黠吏引去鑿湖溉民田  
數千頃人甚德之瑄有遠器而用兵非其所長天寶  
中拜文部尚書同平章事請自將平賊卒致喪師而  
眷任未衰罷爲太子少師

杜咸擢進士第累遷左臺監察御史後遷侍御史出  
爲汾州長史開元中爲河北按察使坐用法深貶睦  
州司馬

李邕字太和揚州江都人少知名武后時李嶠張廷  
珪薦之召拜左拾遺開元中自豐州司馬刺括州善  
典利除害郡人悅服又遷北海太守時稱李北海以  
文章書翰皆過人又號翰林六絕李林甫忌其才害  
之

徐元之建昌人幼穎悟博通經史年十七第進士累  
遷監察御史諫議大夫開元七年出爲湖州刺史遷

鄒王府長史改曹州刺史卒有文集十卷

李俊之開元中爲會稽令縣東北有防海塘自上虞  
江抵山陰百餘里以瀦水溉田俊之增修焉民賴其  
利其後令李左次又增修之

王元暉瑯琊人太和七年爲鄒縣令築它山堰浚小  
江湖灌溉甚博民德之立祠堰旁

齊澣字洗心定州人開元三十六年爲江南東道採  
訪使先是廢鄆州爲鄆縣隸越州澣始奏請復爲州  
以境內有四明山故號爲明州招集流民五百戶安  
輯之

裴光庭開元中爲中書令張景藏能言休咎詣光庭以幅紙大書台字後數日果敗台州刺史有治聲

康希銑以銀青光祿大夫出守會稽有集二十卷見唐書藝文志

李揆字端卿系出隴西開元末擢進士第初苗晉卿數薦元載揆輕載地寒謂晉卿曰龍章鳳姿士不見用麀頭鼠日子乃求官耶載聞銜之及載秉政揆流落凡十六年載誅始拜睦州刺史入爲國子祭酒禮部尚書

劉宴字士安曹州南華人天寶末詔拜度支郎中領一州租庸事宴至吳郡採訪使李希言假宴守餘一邑總大體不苛嘗言士有爵祿則名重于利吏無榮進則利重于名故檢劾租庸出納一委士人吏惟奉行文書而已故唐世稱能理財者唯宴一人而已詳見唐書本傳

陸南金天寶初鄆縣令開廣東錢湖田八百頃民至于今賴之

趙居貞鼓城人天寶九年吳郡太守以嘉興海鹽地廣奏割置華亭縣又海鹽多盜置海寧鎮節束之袁光孚天寶間爲台州刺史沈佺期贈云公四代衣

冠一門忠鯁大才沉毅雅度溫良又云憑熊下欽建  
隼之台甘雨隨傳于往還仁風交扇于朞月果若其  
言爲良吏矣

啖助趙州人後徙關中淹貫經書唐天寶末調臨海  
尉有善政考春秋三家短長號集傳復攝其綱條爲  
例統助卒其門人陸淳趙匡與其子異哀錄助所爲  
損益而纂會之名春秋纂例

鄭虔滎陽人自少好書善圖山水苦無紙慈恩院有  
柿葉日往取葉書之自寫其詩并畫以獻玄宗署  
尾曰鄭虔三絕置廣文館以爲博士居官貧約澹

也遷者作郎天寶末以汚安祿山僞官貶台州  
參軍

鄭至道知天台縣爲政寬簡專務教化民心悅服後  
秩滿邑民攀留不忍其行因留家松關至今有松關  
留鄭故事諭民書七篇尚存

韓滉字太冲以蔭補參軍性強直明吏事三遷吏部  
員外歷戶部侍郎判度支德宗立惡滉掎刻出爲晉  
州刺史未幾遷爲浙江東西觀察使綏輯百姓均租  
調境內稱治里胥有罪輒殺無貸人恠之滉曰此輩  
皆鄉里豪黠不如殺之用年少者惜身保家不爲惡

澆幼時有美名所與游皆天下豪俊晚節益苛慘故  
論者謂其飾情希進云

獨孤及字至之河南洛陽人天寶末以道舉高第爲  
武康令嘗作亭于山後人思其澤因名其山曰獨孤  
山代宗朝以左拾遺召上疏陳時政歷濠舒二州刺  
史所至有惠政徙常州有甘露降于庭

韓洄字幼深京兆長安人以父休蔭補弘文生滿歲  
參調吏部侍郎達奚珣以地望抑之除章懷太子陵  
令無愠容祿山之亂家七人遇害洄避難江南蔬食  
不聽樂乾元中授睦州別駕劉晏表爲屯田員外郎

晏罷乃擢洄戶部侍郎判度支請天下銅鐵冶悉隸  
鹽鐵使復罷冗食胥吏遂致盈積而人不艱食

顏真卿字清臣臨沂人師古五世從孫開元中舉進  
士又擢制科遷監察御史出爲平原太守祿山反與  
從父兄杲卿討賊加河北招討採訪使代宗立出爲  
湖州刺史改尚書右丞俄封魯郡公以正直立朝爲  
楊炎盧杞所忌詔遣諭李希烈不屈遇害公善正草  
書筆力遒婉世寶傳之

李陽冰字少溫趙郡人以詞翰名乾元間爲縉雲令  
脩孔子廟自爲文記之歲旱禱城隍與神約不再焚

其廟及期雨霑足亦自爲記秩滿退居吏隱山後遷當塗令陽冰家書尤著舒元輿謂其不下李斯云杜亞字次公京兆人肅宗在靈武上書論當世事擢校書郎再遷諫議大夫元載得罪亞與劉宴劾治載死遷給事中常袞惡之出爲江西觀察使德宗立召還亞意必任宰相倍道進與人語皆天下大政或以事祈謁輒相然可帝知之不悅罷爲陝虢觀察使徙河中劉宴抵罪貶睦州刺史

趙洵冀州人永泰中爲監察御史後爲衢州刺史時觀察使韓滉素不相容奏免官帝見其名問曰是朕所自知乃以罪聞朕不信

李臯上元初以長史攝温州事州大饑便宜發官廩數十萬斛僚吏請先以聞臯曰人不得食且死何俟命下苟殺我以活衆其利大矣旣貸乃自劾詔嘉之進少府監

李嘉祐字從一趙州人天寶七年進士調江陰令肅宗上元中爲台州刺史大曆中刺袁州又嘗爲中臺郎故竇常賚之曰雅登郢位齊鎮方州有詩一卷號晏閣集



未自勉廣德中爲嘉禾屯田都知修水利畝畝之政  
民始殷富大曆間爲長興令士民頌之一如嘉禾  
慶澄廣德初以左兵曹參軍兼武康德清二縣令邑  
經兵燹澄於瓦礫荆棘之場創置宇舍城郭未及期  
年悉復其舊越歲繁庶過半

蕭定字梅臣瑀曾孫永泰中歷湖州刺史大曆中治  
最與常州蕭復濠州張鎰爲天下第一其勸農桑均  
賦稅勞來流亡在鎰復之右朱泚反詭姓名爲張誕  
不覺于賊後擢太子太師

泌字長源好游嵩華終南不樂仕進代宗時自禮  
碛團練使徙杭州刺史其所行政類非俗吏可及嘗  
引西湖水以城爲六井大爲民利德宗在奉天召赴  
行在泌出入禁中輔相四君數爲權倖所疾常以智  
免因得大有建明柳玘嘗言兩京收復泌謀居多詳  
見唐書本傳

沈清大曆中爲婺州刺史領兵逐逆黨力戰而死贈  
衛尉卿立祠祀之

王密大曆中爲明州刺史有惠政密嘗爲前刺史裴  
儼紀德碣有云余躡高蹤以密之稱裴如此其效法  
前脩不必政自已出可謂淺薄更張者戒矣

吳謙大曆間明州刺史有善政郡民歌血祠之  
裴倣河東人大曆間爲明州刺史逃逋復田疇闢興  
學化民風俗丕變郡人頌其政績

于頔字允元後周太師謹七世孫蔭補調華陰尉累  
遷侍御史爲吐蕃計會使有專對材爲湖州刺史部  
有湖陂溉田三千頃湮廢已久頔至築之獲秔稻蒲  
魚無慮萬計


孔戣字君嚴先聖三十八世孫爲明州刺史政尚清  
簡尤究心于興利除害先是明州貢蚶蛤淡菜水陸  
勞費特奏罷之累遷諫議大夫條上四事一多冗官

二吏不奉法三百姓田不盡墾四山澤推稅爲州縣  
弊

任侗貞元九年爲明州刺史郡有廣德湖歲久湮塞  
侗爲之浚築溉田四百餘頃當時之民賴之

路應貞元間爲處州刺史尋移温州時樂成橫陽界  
中久廢湖防多水患應大爲脩築民咸德之

裴肅濟源人初爲常州刺史以進奉遷浙東觀察使  
貞元中明州鎮將栗錕殺刺史盧雲誘山越作亂攻  
陷浙東州縣肅擒錕于台州送京師斬之



A rectangular area containing several vertical lines, likely representing a column of text or a table structure. The lines are thin and black, set against a white background. The text within this area is mostly illegible due to the high contrast and the presence of the watermark.

Small, faint markings or text located at the bottom edge of the page, possibly a page number or a small signature.

